

Homoseksualnost (nije bolest?)

Svjetska zdravstvena organizacija je uklonila homoseksualnost sa svog spiska bolesti 1992., a u Sjedinjenim Američkim Državama homoseksualnost je već 1974. uklonjena iz klasifikacije mentalnih bolesti. Medicinski i naučni stav je da su homoseksualnost i biseksualnost normalne seksualne orijentacije jednako kao i heteroseksualnost. Homoseksualnost nije bolest i ne može se „liječiti“.

Homoseksualnost (nije nenormalna ili poremećaj ličnosti?)

Homoseksualnost se sa naučnog i medicinskog stanovišta posmatra kao prirodni varijetet ljudskog ponašanja i nedjeljivi dio ličnog identiteta.

Američka psihološka asocijacija navodi da je nekoliko decenija istraživanja i kliničkog iskustva, usprkos stereotipima koji karakterišu lezbejke, gejeve i biseksualne osobe, dovelo do toga da sve vodeće medicinske i psihijatrijske institucije zaključe da te orijentacije predstavljaju normalne i prirodne oblike ljudskog iskustva.

Broj homoseksualnih i biseksualnih osoba (nije u porastu?)

Broj lezbejki, gejeva, biseksualnih i transrodnih osoba nije u porastu, već sa smanjenjem diskriminacije sve više njih otvoreno ispoljava svoju seksualnu orijentaciju, što stvara utisak da se njihov broj povećava.

AIDS (nije bolest samo homoseksualnih osoba?)

Rizik zaraze virusom HIV-a zavisi od rizičnosti seksualnog ponašanja osobe, a ne od njene seksualne orijentacije. Ovaj rizik se smanjuje i sprečava upražnjavanjem sigurnog seksa tj. korištenjem zaštite (kondoma). Osoba koja prakticira seks bez korištenja zaštite može se zaraziti HIV-om bez obzira na svoju seksualnu orijentaciju.

Prema posljednjim podacima Zavoda za javno zdravstvo FBiH i Instituta za javno zdravstvo RS, prvi registrovani slučaj HIV/AIDS-a u Bosni i Hercegovini zabilježen je 1986. godine. Do 1. decembra 2012. godine, u BiH je registrovana ukupno 221 osoba sa HIV infekcijom, od toga se kod 120 osoba razvio AIDS. Prema polnoj strukturi većina su osobe muškog pola (80,5%), a glavni put prenosa je i dalje heteroseksualni (52,1%), a zatim homo i biseksualni (28,5%). U odnosu na uzrasne grupe, najveći broj registrovan je u uzrastu 20-29 godina (33,8%), zatim 40-49 godina (26,3%).

Propaganda (ne) može utjecati na seksualnu orijentaciju mladih ljudi?

Kao što zakonske zabrane homoseksualnosti, kažnjavanja i diskriminacija nisu mogli da promijene ili iskorijene homoseksualne osobe, sigurno je da informisanje o homoseksualnosti neće utjecati na promjenu seksualne orijentacije heteroseksualnih osoba bez obzira na njihove godine.

Homoseksualnost i biseksualnost (nije stvar morala, vaspitanja ili mode?)

Predstava o homoseksualnosti kao o nemoralnoj pojavi izražava subjektivno mišljenje pojedinaca koja se uglavnom zasnivaju na vjerskoj dogmi. S obzirom da su se moralne norme i sam njihov značaj mijenjale kroz historiju, u demokratskom društvu je nemoguće zamisliti da bi ove norme mogle biti osnov za ograničavanje osnovnih ljudskih prava drugih.

Sasvim je sigurno da niko ne može postati gej ili lezbejka samo zbog uticaja društva, okoline ili onoga što je vidio/la na TV, internetu ili u novinama. Sva trenutna istraživanja pokazuju da je većina homoseksualnih osoba odgajana u heteroseksualnim porodicama, kao i da većina djece odgajane od strane homoseksualnih roditelja bude heteroseksualno.

Homoseksualne i biseksualne osobe (ne) predstavljaju opasnost za djecu?

Američka akademija za dječiju i adolescentsku psihijatriju nije našla nikakav dokaz da lezbejke, gejevi ili biseksualne osobe predstavljaju bilo kakvu opasnost za razvoj djece ili adolescenata veću od heteroseksualnih osoba. Seksualna orijentacija ne utječe na vjerovatnoću da bi osoba mogla zlostavljati djecu. Povezivanje homoseksualnosti sa pedofilijom zasnovano je na pogrešnom tumačenju i zloupotrebi ovih termina.

Homoseksualne i biseksualne osobe (ni)su odgovorne za pad nataliteta?

Ne postoji veza između priznavanja prava homoseksualnih osoba i pada nataliteta u određenoj državi. Zemlje Skandinavije, koje najviše priznaju prava homoseksualnih osoba, su riješile problem pada nataliteta stvaranjem poticajnog političkog okvira za žene, djecu i porodice, i dostigle relativno visoku stopu nataliteta, dok neke druge zemlje koje imaju represivnije mjere prema homoseksualnim osobama imaju i najozbiljnije demografske probleme.

Prava homoseksualnih i biseksualnih osoba (ni)su specijalna prava?

Lezbejke, gejevi i biseksualne osobe ne traže nikakva specijalna prava, oni traže samo da bez diskriminacije uživaju ona prava koja su međunarodnim konvencijama, Ustavom BiH, ustavima entiteta, Statutom Brčko distrikta i zakonima u BiH zagarantovana svim osobama i koja spadaju u osnovna ljudska prava (pravo na život, na slobodu izražavanja, okupljanja, socijalnu i zdravstvenu zaštitu).

Priznavanjem prava homoseksualnih i biseksualnih osoba (ne) oduzimaju se prava drugih?

Priznavanjem prava lezbejki, gej muškaraca i biseksualnih osoba, heteroseksualnim osobama oduzima se jedino „pravo na diskriminaciju“, koje i nije pravo, a sama diskriminacija je već zabranjena Zakonom o zabrani diskriminacije u BiH.

Lezbejke, gejevi i biseksualne osobe postoje i u Bosni i Hercegovini!

Procjenjuje se da homoseksualne osobe čine oko 10% svjetske populacije, te nema razloga zašto u Bosni i Hercegovini ne bi bilo ovih osoba. Međutim, s obzirom na sveukupnu ksenofobičnost društva, inertnost i nezainteresovanost državnih institucija, kao i slabu implementaciju zakona koji bi štitali njihova prava, osobe homoseksualne orijentacije u BiH spadaju u najmanje vidljivu grupu građana koja je najizložena diskriminaciji i nasilju.

Ukoliko imate nekih pitanja ili želite dobiti više informacija obratite se Sarajevskom otvorenom centru, na broj telefona 033/ 200-073 ili e-mail adresu: office@soc.ba, Fondaciji Heinrich Böll - Ured za BiH 033/ 260-450 ili e-mail adresu: info@ba.boell.org, ili Fondaciji CURE 033/ 207-561 ili na e-mail adresu info@fondacijacure.org.

Ovaj letak je urađen uz pomoć Evropske unije. Sadržaj letka je isključiva odgovornost Fondacije Heinrich Böll - Ured za BiH, Fondacije CURE i Sarajevskog otvorenog centra i ni u kom slučaju ne predstavlja stanovište Evropske unije.

Ovaj projekat finansira
Evropska unija



Projekat implementira:

HEINRICH BÖLL STIFTUNG
BOSNA I HERCEGOVINA

Partneri na projektu:



Sve što trebate znati o homoseksualnosti i biseksualnosti!